

四庫全書薈要

• 乾隆御覽本

集部

欽定四庫全書薈要

集部

御定歷代賦彙補遺卷十六  
七

詳校官候補通司經歷臣郭祚熾



御定歷代賦彙補遺卷十六

花果

後瑞蓮賦

明  
申時行

有韓者華婉如清揚茁茁為簪芙蓉為裳出五沃之上  
腴兮苞九疑之奇芳繫中通而外直兮洵篤實而輝光  
德可比於君子兮又奚遜夫國香羌託種於靈沼兮載  
移根於長樂挺翠蓋之團團兮冒朱華之灼灼枝承蕤

以婀娜兮何揚翹之磊落揉珠酌以成葩兮煥重英之  
出萼森濯穎於芝房兮儼敷榮於茵閣朝晞髮於扶桑  
兮若葵赤之常傾夕弄影於望舒兮象桂輪之載盈我  
星冠於絳闕兮散霞標於赤城鳳羽矯其翩翻兮蜃樓  
起而崢嶸恣意態之橫出兮紛可炳於丹青彼新宮之  
嵒業兮固神靈之所宅薰風扇其淳和兮甘雨滋其薌  
澤卿雲助其爛熳兮膏露增其的皪夫惟孕粹而鍾祥  
兮肆焜煌而舄奕乃其含芬桂掖流煜椒塗承恩輝於



黼幄兮分繡采於翟褕映畫堂之甲帳兮迎紫闕之金  
輿燦榮光於華渚兮鬱佳氣於蓬壺宮伯忻忻而告瑞  
慈顏穆穆其歡愉何司花之特巧殆坤元之出符天子  
乃考祥圖披靈契徵素蓮於王母遡石蕖於炎帝或一  
房而百子或一花而千歲兆多壽而多男允卜年而卜  
世於是羣臣效三呼之祝薦萬歲之觴陳瓜果蒔椒聊之  
什詠竹苞松茂之章曰文子與文孫兮俾熾而昌曰聖  
母及聖皇兮俾壽而康如重臺之積累共乾坤而久長

臣拜手而作頌庸昭示於無疆頌曰瞻彼璇宮臨紫極  
兮仙籙神池滙靈澤兮煜煜奇葩產禁掖兮綠葉朱華  
苞翠藹兮重英疊萼何艷赫兮地符山川帝申錫兮百  
世本支兆蕃碩兮慈齡聖算齊箕翼兮小臣獻頌揚休  
德兮福祿萬年子孫千億兮

黃蜀葵賦

唐韓偓

色配中央心傾太陽布葉近臨於玉砌移根遠自於銅  
梁萼綠華未遇楊義冠簪駸駸杜蘭香喜逢張碩巾帔

飄揚銀漢之星機欲曙金臺之漏箭初長動人妖豔馥  
鼻生香千里鵲雛濫得名於太液三秋菊蕊虛長價於  
柴桑向日微困迎風欲翔周昉神疲吮筆而深慚思拙  
江淹色沮擘牋而所恨才荒蝶翅堪憎蜂鬚可妒幾多  
之金粉遭竊一點之檀心被污何須逼視漢夫人之鴛  
寢多羞不待含情晉天子之羊車自駐激電寒暄跳丸  
烏兔得不淹留深勞顧慕懊恨張京兆唯將桂葉添眉  
悵望齊東昏却把蓮花襯步騷人易老絕色多愁曷忍

在綺窗側畔唯當居繡戶前頭目斷猶駐魂消未收映  
葉而似擎歌扇偎欄而若墮妝樓感荀粲之殷勤誓無  
絨著怨謝鯤之強暴未近風流清旦鶯啼黃昏客散鶴  
頸兮長引猿腸兮屢斷攀條立處林烏應笑於後栖枝  
枕看時梁燕或聞於長歎已而已而唯有醉眠於叢畔

菊賦

明  
俞允文

伊茲菊之貞麗挺庶類而擅奇含內美之醇精敷藻倩  
之清儀翠葉掩以蓓茂紫莖翕其裊離迎上春而解作

凌九陽而振蕤越流芳於秋坂託纖根於幽崖揉五色  
而相宣鬱彪炳其陸離狎鳳子來毛姬繡分苔徑錦匝  
煙區影亂蕙河之燭光搖兔苑之芝足使華林掩綉琪  
樹韜姿晃雕霞之驚絕藹繁星以紛菲矧夫爽籟凝陰  
涼飈送燠日短晷以向南雁違寒而度北露泠吳宮之  
草波增漢皋之曲人有愁而必盡物無微而不肅天泐  
寥兮彌高木蕭槭兮就剝彼晚榮於此時曾靡渝於茲  
菊匪負霜而淪操每參露而逾馥值女兒而蕃滋出甘

津於濬谷纂嘉名於流記閱上藥於丹籙若夫英穎考  
樂仙徒邁俗或餐英以充虛或擷蕊以佩服或咀實以  
引年或傳葩以代祝或咽液以療疴或沈醪以媚獨故  
其為性也可以比德而延期其為芳也可以揚娥而表  
淑粵有南國大台中朝元輔覽鳳圖以修文總虎賁而  
勵武道無謝於佐殷日有臨於生甫玩玄月之改律又  
朱明之徂暑欣年志之樂康省勛庸之豐偉而乃闢華  
堂涉芳圃登上客召真侶烝蘭肴沃歡醕懿珍卉之能

靈叶令人而煜燁莫不散賞以娛衷仰希曩哲之遺軌  
於是復有南園逸叟東海遐賓恭聆勝事緬想清塵慨  
服義之既闊慙酬德之無因遂命圖於縑縞聊稱歌而  
遣言歌曰金商戾兮被勁楚月華白兮蟋蟀入戶清氣  
乘兮輕桂舉神怡愉兮美無度陽芳絢兮彌終古宜永  
御兮壽黃耆願申頌兮承靈祐

菊花賦

明  
張鳳翼

南呂商音晚西方白帝深金風淒遠塞玉露湛高林蘭

既摧而黯淡亦敗而蕭森楓有丹而盡瘁藕無碧而不沈唯鬱鬱之朱羸冒羣陰而特起對涼月以分華傲嚴霜而縱恣抽麗質於陂塘挺幽姿於薊苑迺有黃英白萼紫莖青柯歲蕤穠醇雲布星羅或低枝而偃仰或振蒂而婆娑或含晶而色媚或似醉而顏酡於是越妹燕姝宮妝乍理嫋娜臨叢薄言掇只伸素手兮纖纖落芬葩兮藥藥橫翠鈿兮高簪散芳醅兮未已若夫畫堂別墅讌樂嘉賓玳筵羅列綵檻開陳嗅寒香兮引滿恣



惟賞兮陶真覽秋光兮猷擅豈凡卉兮能倫故雲母貞  
矣墮於空大夫榮矣擬於竊海棠神仙也而讓其操笑  
葉君子也而遜其節然則爾固燕山桂子之同盟庾嶺  
梅花之與列夫寧廣陵芍藥之堪儔興慶牡丹之可絜  
是以朱孺因而得道葛洪借以通玄靈均餐而寄憤元  
亮對而留連枕其花可以療目酌其釀可以消瘴維爾  
精之妙用擬衆彙其誰先於戲魏紫姚黃牽蜂引蝶爾  
獨離器清秋煜煜蜀城之錦綸閣之薇人誇富貴爾獨

忘機玄都之桃隋堤之柳人競繁穠爾獨自守迺知趨  
炎非志冷淡維馨素娥趁色青女宜形催無庸於羯鼓  
護不假於金鈴誓陽九而不易歷百戰以亭亭爾真物  
傑也哉蓋嘗論社稷耄柏方知麥秀之賢水老豐芑始  
見黍離之愛物理人情存亡向背人以爾耽隱士之遺  
吾喜爾抱忠臣之槩

鞠賦有序

明徐渭

渭既賦牡丹滕子復申辭曰曩吾之庭牡丹春華菊英

秋發吾子抽精於彼而絕響於此母亦如吾所謂避其涼而趨其熱者乎渭曰有是哉子之善戲而狎也乃筆不停綴詞不及展遂賦曰

誰乎誰乎芒芴曷常春至麗日秋臨抗霜彼亦何熱此亦何涼惟付與之是聽非知計之可詳履子廣庭覩茲烈芳繁名相之別數亦芟莖之異萌染不出於五色維其變之莫量歷九秋而自如周數望而靡謝從顏色之中乾永附蒂而不舍於時白帝司辰冽冽辛辛木葉下

而草萎霜露降而雁征乃自圃畦遷爾廣楹一則不足  
百尚有羸羣而不黨矜而不爭槩望若結伴而達俗單  
玩則各立而獨行乘金令而始拆秉土氣之正精雖雜  
采之並敷惟彼黃之盛榮諒盈庭而冒錦亦剖符而鎔  
金耀愈澤而不妖烈無吹而自馨方辭謝乎徑塗處規  
埴而託身非瓦礫以為嘉存大朴之希聲彼主人兮誰  
子懷高廓兮心貞秉珪璋之潔白樹文學之干旌則有  
幽人處士墨卿逸史候節序之高朗知寒燠之迅駛弭

蓋於門肅隊而至或移觴而就筵賦篇章而未已爾則  
不以物驚不以物喜挺危朶而愈勁舒正色而不媚匪  
鉛華以事人多君子之枉戾豈無人而不芳亦胡庸以  
采佩當夫青陽發生桃李盛花名園如霰上國如霞嚶  
好鳥其載鳴將何物之不化胡爾類之自矜乃偃伏其  
萌芽迨寒氣之始肅日馳騫乎南陸雲慘澹而無光野  
何萌而不縮爾乃自耀其孤標眇賤同而貴獨謂所性  
之若斯兮或未必其盡然夜不可以為夙兮晨不可以

為昏苟榮悴之有時奚爾類之能專將推之而不後抑  
挽之而不前彼蒼厚爾以遲莫又何辭於末年紛後先  
亦何心兮避桃李之盛時抗素秋而挺茂兮終焉保其  
不衰至乃微霜襲宇驚飈振帷萼紺紫而不起葉比次  
而下垂閨閒宇兮無人况星月之懸輝則有似乎貞女  
永絕乎夫君故臣懷國而酸悲尹子履霜於中野蘇武  
啗雪於沙陲在顛沛而愈厲至九死其靡違外容色之  
彫傷實中心之永矢嗟主人之懷抱美材質之修嫿逾

盛年而云邁稍凌夷乎末路苟蒼蒼之爾私兮又何病  
於遲莫日中昃而彌烈兮金粹精於融鑄直守貞而罔  
渝於茲英其何負余假托以抒忱兮信母必而母固

聚八仙賦

有序

明  
謝肇淛

齋中有卉色若茱麗一簇八花環列內向土人謂之聚  
八仙云郎仁寶楊用修皆所稱未見者異而賦之

靈芝罕根神漢無源胡一莖之弱卉乃羣仙之聚焉爾  
其翠棼綠蕤勁柯柔莖綢繆荏苒蔥蒨離披挺繁英之

莫莫掩重幄而萋萋露華天氣娥影華池雲生朱樹風  
颺璫枝恍三島之瑤闕洵上真之所棲若乃玉質冰膚  
雪衣鶴羽綽約聯翩招邀伴侶金格青童藐姑處女躡  
景步虛或三或五厭洞天以巢居辭淮南而木處於是  
奇香泛空道姿曜日俯灌靈根仰吸玉液乘風搖曳不  
啻太一之蓮並坐歡猥何異商山之橘稽諸往古諏之  
殊域信神農之所未嘗亦戎王之所靡植廣陵之瓊花  
遜其佳名甘泉之玉樹慙而寡色固宜稱場圃之殊珍



夏亭亭而獨立

桃賦

宋吳淑

果實多品惟桃可佳天天其色灼灼其華或成仙而益  
壽或制鬼而祛邪或美后妃之德或報瓊瑤之華驚蟄  
應氣而斯盛農人為候而無差陟雲臺而臨崖布綺遊  
武陵而夾岸舒霞妒媚常聞於武女愛惡潛移於子瑕  
至若綏山刻木神荼索葦犯上既戒於文侯雪賤復聞  
於夫子神女嘗食於二郎齊相亦殺乎三士崑崙以霜

實稱奇磅礴以寒英表異旒旒異狀而同名侯白殊味  
而俱美別有綺葉金城之號紫文紺核之名雖云六果  
之下誠為五木之精高丘餐膠而輕舉師門食葩而道  
成復有梧羿之事畏漢之情玄冬霜林之茂朱夏豆實  
之英至於漢皇方朔潛偷僊李傷嗟於見累土偶哀憐  
於載浮樊氏競術於靈變蔡誕託詐於仙遊亦有種列  
三名實盈十斛太清漬花而療疾抱朴服膠而絕穀或  
呪之而頰面或出之而剖腹豈若饗碧實於西遊標嘉

名於仙錄

櫻桃賦

梁宣帝

惟櫻桃之為樹先百果而含榮既離離而春就乍萋萋  
而冬迎異羣龍之元首殊大器之晚成鳥纔食而便墮  
雨薄灑而皆零未覩紅顏之實空有薦廟之名等橘柚  
於簷戶匹諸薦乎中庭異梧桐之棲鳳愧綠竹之恒貞  
豈復論其美惡且聳幹乎前櫺葉繁抽而掩日枝長弱  
而風生且得蔽乎羲赫實當暑之淒清

枇杷賦

明 薛章憲

皇有嘉植貽於富媪剛勁外挺堅貞內抱實玉顆兮彈  
丸葉金刀兮剛卯爾其舒華耀日擢穎凌霜褫素縞披  
黃裳剖雉膏截鵞肪薦雕俎侑玉觴搏瑞露咀瓊漿陋  
道傍之苦李失召南之甘棠故夫千百綴枝十五並蒂  
榮榮水蒼纍纍火齊獸有王孫兮朶頤而諦窺鳥有公  
子兮駭目而增逝酢失綠橙甘分丹荔皎齒咀兮犀欲  
動纖手剥兮蟬自蛻若夫淵材抱恨子京獨歎冰水晶

熒兮溶煖蔗霜瓊錯兮流寒珊瑚木難兮槎牙而麗網  
夜光明月兮鑿落而走盤既乃移根上林授種下土琅  
玕周廬翡翠當戶列亞夫之檠戟植寄奴之葆羽巴橘  
寧論邛蒟奚取沾雨露以濡沃凌霜雪而徑度若夫牡  
丹朝酣海棠夜睡卿雲旖旎以零亂緋霞紛紜而翦製  
倏忽殞穫須臾淪替借兒女之戲玩發壯夫之深喟豈  
若游龍夭矯修蛇詰屈四時不彫凜貞松之操一朝而  
盡笑柔桑之苑匪光榮易歇而德焉二三蓋深固難遷

而志則專一  
樛枝婆婆聳幹兀律謝春紅之灼灼含晚  
翠之鬱鬱者歟

荔支賦

明林古度

吾閩佳果有荔支焉歷代稱美百莫能先產既炎土生  
復炎天為樹嘉蔭為花細妍及其成實外赤中鮮纍纍  
若若紅香滿前其品果貴其質可憐衆彼名號後人強  
鵠雜沓瑣屑荔不必然荔之為物別有自全勿翦勿伐  
匪原匪田厥根厥本亦風亦烟不知唐室取媚嬖媚致

勞驛騎反以為愆非荔之過由人所牽君子終諒不倚  
不偏既充甘食亦奉華筵一切種類畢莫能賢雖足珍  
兮未敢自專世所尚兮桃棗成仙爾表爾裏色味相兼  
粵酸蜀澀鼎足殊懸三都見侈萬古難捐漢王唐張兩  
賦爭傳予曷能贊億萬斯年

荔支賦

明 蔣德璟

若夫金梭栗玉虎斑龍牙麝囊椰鍾黑葉綠紗蚶殼朱  
柿星球雞肝霞墩松蕾金線冰團牛心鵲卵淨瓶蜜丸

夫固亞僕乎瀘粵然猶閔園之下丹也往者忠惠之書  
譴於方氏橋二百而為識竟淪淹於鐸里維鐸及奕誕  
降嘉穀延壽是享祥井是沈移紫度緋法藍心恥流觀  
夫伏燭秋回百荔垂藏黛葆扈雲彤實射暹夜星晝燭  
圓蓋方陣譬若火烽其木不燼又若琅玕萬斛鳳九離  
離芸風氣聞千步又若洛媛含辭未吐寒泉三尺漂浴  
天芳又若合德初出蘭湯廣上圓下皓肪中沒又若宜  
主柔溫無骨霧綃半劈醴津斯醺龍漿斯落又若吉雲



露珠一勺袒膜醴英又若水晶顰核焦封又若丁香應  
啜灰減又若甜雪留芬射越弛服墜裾又若茵墀流汁  
入渠故其冬青春榮之性絳襦玉膚之狀駁犖辯豔之  
妝蠲渴補髓之渾亮羣族之所伏嗟難得而覩況是以  
釵頭盛鬢雙髻奉獨王娘鄣袂將軍攤鐺服其實者挹  
膏漱瓢為荔羨偃昔扶荔之宮積草之池金明搖風十  
不一易若乃洛陽置於嶺南長安盡於巴蜀法部初哇  
明駝暗翻撫酸苞而虛憐悵珠靨之已禿悵嬌環之解

笑固以城功為結綠忠惠之書掩二產汰閩江之陂鵠  
未若茲種纂歷乎三十二之外重曰震氣五滋狎獵的  
纚生代巧兮荅還蚌胎誰其冠者繫延壽兮元鼎風埃  
宣和航瓦珍非質兮皇罕連寶願登上林比禹橘兮

栗賦

陳陸瓊

四時逸盛百果元芳綠梅春馥紅桃夏香何羣品之浮  
脆惟此質之久長外刺同夫拱棘內潔甚於冰霜伏南  
安而來清列御宿而懸房薦羞則相榛並列加選則菱

焚同行金盤兮麗色玉俎兮鮮光周人以之戰懼大官  
稱於柏梁

橘賦

宋吳淑

伊盧橘之夏熟淪璿星之粹精茂彼江浦繁茲洞庭揚  
州之貢蜀郡之英既踰淮而為枳亦渡江而作橙忠臣  
之心既申於楚相純孝之感更見於王靈香皮赤實綠  
葉素榮交甫贈之而著美陸績懷之而顯名若夫雕飾  
是資芬芳足貴吳王納貢單于荷賜交趾既為置守南

越亦云有稅閼澤抗表以除籍楊由占風於受饋庾亮  
之貢已稱於同牴僧辯所陳更驚於共蒂別有箕山曉  
色羅浮晚香用之給客舉以名堂江陵致富比之於千  
戶莊周著論譬之於百王虞愿不取而道顯桓儼繫樹  
而名揚亦有裂牙酸酢撫手華飾晏子侍坐而不剖嚴  
遵當賜而靡食代苦桃而已誤夢黃衣而更失若夫達  
江洲之暖氣處玄朔之寒色彼南土之不遷諒難成於  
甘實斯固百越所厭飫而堯舜不常食也

哀木奴賦

明吳信

嗟木奴之有生實后皇之佳裔世受命於南國萃山川  
之靈異族蕃昌而奕葉本深固而難徙縣厚蔭之不拔  
爛文章之有子歲貢膺所司之采擢登用得聖君之啓  
齒功侔舊勲之梅貴勝同年之李陪宴羣臣動寮采之  
憐食邑千戶與封侯之擬其精色內白有屈子之頌稱  
剖膚為用在神農之吮咀及其托迹洞庭攝生角里甘  
和光而同塵能屈身而養士顧予生之無能素志拙於

經紀慨藝業之弗興實賴奴而生理蒼頭莫若便了難  
比日愛敬踰外賓時保養如內穉病則砭之以鍼渴則  
飲之以水積累年調護之勤為百歲悠長之倚胡彼蒼  
之不慈遺乃酷降茲之陰沴雲層埋於白日雪丈積於  
厚地風勢驕而凜冽土脈塞而扎厲俾奴寒不能禁凍  
不可避始僵體而裂膚漸垂頭而喪氣徒扶植之再三  
枉救治之百至禍橫連於赤族澤竟斬於斯世種類無  
遺大小俱斃人觸目而斷腸家疚心而酸鼻饑渴仰食

寒何從衣匪惟痛惻其無辜抑又渴思其風味乃歌楚  
些以招曰天道茫昧其難知兮世澤靡常信可疑兮春  
而祁寒候弗時兮生而肅殺令逆施兮弗義者亡理則  
宜兮奴德而義咎何罹兮吁嘻木奴情可悲兮

木槿賦

晉傅咸

覽中唐之奇樹稟沖粹之至精應青春而敷葉逮朱夏  
而誕英布天天之纖枝發灼灼之殊榮紅葩紫蒂翠葉  
素莖含暉吐曜爛若列星朝陽照灼以舒暉逸藻采粲

而光明罄天壤而莫儼何菱華之足營

瓜賦

晉張載

羊骹虎掌桂枝蜜甯或玄表丹裏呈素含紅豐膚外偉  
綠瓢內釀甘相夏熟丹柰含芳朱李零於桂浦蒲萄潰  
於椒牀雖茲肴之孤起莫斯瓜之允臧超椰子於南海  
越橘柚於衡陽若乃檳榔椰實龍眼荔枝徒以希珍難  
致為奇論實比德孰大於斯

逸句 附



朱實賦

晉潘岳

煥若隋珠皎如列星

木槿賦

晉夏侯湛

洛神樹之修異實積陽之純精  
蜿潛根以誕節據川壤以擢莖  
皎日升而朝華玄景逝而夕零  
逮明晨而繁沸若靜夜之衆星  
長莖攢起柔條列布濯靈柯於  
時雨滋逸采於豐露灼煌煌以  
煒煒獨崇朝而達暮於是茂樹  
蒼蒼纖枝翩翩潛光玉朗綠葉  
翠鮮

木槿賦

晉 盧 諶

覽庭隅之嘉木羨朝華之可玩俯浸潤於泉壤仰晞影於雲漢

百合賦

唐 王 勣

荷春光之餘煦托陽山之峻址比蓂莢之能連引芝芳而自擬爾其布葉相從潛根必重示不孤於日用欣有叶於時雍嗤五葉之非偶陋三花之未濃亦藐兮不可長辰兮不可逢恐鷦鷯吟兮衆芳晚幸左右之先容

鳥獸

振鷺賦

唐李德裕

有羣飛之振鷺顧儔匹而弄音始遵渚而亂下若濤起  
於清潯俄矯翼以歸來疑霰集於平林散雪彩於江烟  
暖霜容於寒日映楓葉而暫見入蘆花而還失

舞鶴賦

明姚綬

鶴傿傿而解舞匪委翅於凡禽俯坎水而引吭仰雲霄  
以馳心宜翩翩而躡武肯啁啾以諧音詫山香於玄覽

狎霓裳以幽尋雜干羽其無貳超羣鷺為既多玄裳逼  
乎墨卿縞衣亂夫鉛華世乏人以抗衡時有娥而曷姱  
徐招搖於倒景遙奮迅於朝霞宛轉而凌峰牽連而繞  
池抑為媒以求類故乘軒而久羈羌昂藏於舉動昧今  
昨之崇卑幸無塵以沾污嗟有羣而仳離於是壽擬千  
禩變皆七年性度豫地胎靈孕天高足棲渚渥頂臨泉  
神乘火精夢越蓬山既而歸立華表不闕城郭人民已  
非感慨荒落冀翱翔於太虛窺朕兆於冲漠色泥水而

生點氣秋金而畏灼憶孤嶼之梅卉睇巢居之草閣苦  
鴻騫之忽下惋驚停之未躍掩冉低徊激烈顏推瞻之  
若歇少焉若飛向人僮僮戀主依依平蔡功成浴沂詠  
歸行行踽踽朝朝暮暮名號登仙光華載路青黃減采  
洪纖逸步退將駿奔進留餘趣赤壁顧笑青田忘形俾  
無後言式借先聲方來倏去既縱復橫斷終希續疎且  
致密紛紜之間泯茲文質周折其旋弗遺纖悉將尋途  
而奚慕欲舍此而焉之勢凌競而憩息情歛歛以矜持

爰致垂世之古賦亦或起宇之遐思於是時也走生仲  
達巾幘蒙恥受規老聃殆辱知止養六月而復升鳴三  
年而終擬信其然而然乎展命爾而爾耳孰騎謁於帝  
鄉記修詞於仙里

籠鶴賦

有序

明程誥

永寧介戎瀘之間蓋古蘭州也其地險隘民夷雜居俗  
陋肆悍嘉靖中泃溪子久稽斯土衛解舍旁有孤鶴被  
繫於籠者見人輒伸頸長鳴若將欲翬舉者予心悲焉

竊感夫子居夷之義作龍鶴賦以自廣云

余竊悲夫胎化之偉禽兮挺明迴之令姿稟陽剛之健  
質兮被霜雪之羽儀戴崇華之凝丹兮挾襪褫之緣緇  
年七九而形變兮時十二而聲依性爽朗而內潔兮才  
逸瞻以自資故其含精獨立跡與道并洪髀修趾毛豐  
肉輕行依芳嶼飛薄秦清後塵擅其舞警露揚其音雖  
托名於禽鳥抱超曠之異心等遐齡於龜鹿恥為羣於  
家禽嗟命數之窮阨每拊膺而弗禁掩雲羅之一目俯

籠檻以迨今且其委身順物遠害任智馴養閒暇棲跼  
簡易動無情容靜無怠意何茲禽之野性能安然之逮  
繫爾乃境遺寥闌日感喧卑長鳴如訴喪侶疇依思茂  
林之翦薈罹寒暑之載移子離鄉以逆旅臣去國而居  
夷彼明賢之坎壈亦寄詠於式微矧羽族之宗長容永  
久而拘縻望海天之恢廓悵九皋之願違枉軒車之每  
載匪予心之攸宜豈神容之可珍荷君子之明德雖垂  
盼於區區孰若曩時之自適顧昂然之介標與雞鶩而



競食感在陰之鳴和哀母子之離隔念赤霄之修阻奚  
寵辱之足驚嘆羈孤以失所苟默默以喪生循庭除以  
頓距睇天步而寄聲羨嵩緌之喬嶽徒嚮慕而效誠類  
池魚之圉圉想海逝而游行若迺金氣已肅海燕告歸  
風蕭蕭以淒緊月澄廓而流輝引圓吭以清唳鼓垂翅  
而安施幽士見之而感泣羈人間之而增悲審生生之  
理足媿稻粱之秋肥恨識微之不先致負累於今日忖  
踣躓之薄軀無懷寶而外飾何天壤之懸絕情愴怛而

屢失窺池藥以散矚怨影獨而神遼結曠懷於絕徼冀  
一舉而風飄儻隆恩於垂被啓鍊鑰而見超達四翎之  
罔鍛矯雲際而遊遨序文鵷而接翅媿冥鴻之莫招謝  
時人而迺去適玄圃以逍遙

放部鶴賦

明 沈朝煥

繫萬品之陶蒸矯惟鶴其高標易循占於和陰詩矢諫  
於鳴皋踐嵩嶽以散幽孕青田而玄唳為君子之化身  
作仙人之騏驥頂銜丹其孤承翼霍雪而雙墜窮野馬

以廣運干羊角而上至爾乃介性少疑厲響昂步舉惟  
前軒趾不後顧中瀏睨於爵量望靨合於掩簿隨俗宛  
轉爰立府亭照影月白引吭煙青睹僚序而扇起聞朝  
鐸而應聲立必倚廡出不踰楹指規翔而自驚舞影節  
而未停或其階樹僑樓門卒仰給安無一枝食必數粒  
拾腥餘而委薦頻污瀆而引吸觸鼯鼯而若驚與雞鷺  
而同適雖假榮於致養徒違漠於見羈離崑閬之浮曠  
習塵瑱之喧卑樊中之神不王而人間之跡非宜於是

韜精火德結氣金商塌羽儀而噍殺叫清露而彷徨既  
躑躅於龍躍復偃蹇於鳳蹠曳彫尾而自憐延修頸而  
訴臆儻乞哀於主人願放逐而未得寧驂王孫而嵩舉  
兮豈慕高衛帶而朱軒抑偶處子於遼沙兮焉能舞吳  
市而炫煜於衆觀指洪姁於煙際委鮮潔於雲端守公  
庭而乍繼終遐舉而孤翰願賓鵬而侶鵬每嗤鴛而搯  
鵬誇羞鳥而奮距度繁姿而游躑工吐納於玄舉守千  
齡而未化抱清迴於蓬壺又何羨乎戟祀之間華屋之

下

放鵠賦

有序

明  
王廷相

鵠鵠類也海人以械致之鍛其羽而貨於市予求而畜之毛翮更生放之中野一旦秋風灑天翩然而翔童子報曰鵠逝矣乃作放鵠賦其辭曰

嗟大化之絪縕兮氣平施而普生何爾性之間遠兮超羣物而構精衣玄縵以貞朴兮頂丹砂而炳文擅羽族之清麗兮豈鵠鵠之可羣排決瀟以孤高兮匪塵界之

所制凌倒景於無極兮偕羽人而謁帝彼守靜其德之  
介兮恒遠害而知幾中無欲而類仁兮曰沆瀣而是希  
比夫山澤之逸癯兮祈鳳鳥以為臣陋鸚雀之搶榆兮  
競高下於荆榛固偉志於超軼兮天命邈其難辯偶防  
檢之不周兮遂拘攣而罹患衆矜巧而加冕兮孰懷舊  
而悲鵲免割烹於珍食兮幸眇軀之猶全分委命於泥  
塗兮抱煩冤而自傷將偃蹇以待盡兮魂赳赳之如狂  
彼哲人之中口兮遭青蠅之遠斥望帝閭而不見兮衷

信美而執測雖小大之殊分兮均逆悰而幽辱古有悲  
於陸沈兮執靈蔡而焉卜何君子之好德兮乃私心而  
憐之挹斗水以澤鮒兮捨金錢而贖龜藉清冷以照影  
兮拂景風而載噓新翼修而日華兮時翱翔而思舒蒙  
釋汝於中野兮聞同聲而引領激風颭以迅縱兮歷九  
萬於俄頃黃鶴邁而延佇兮弔曩迷之不淑故雌尤夫  
筑獨兮衆離悅其來復世淫佚而好戕兮鵬勸來者之  
不可誤爰居就陳詞兮願無忘夫窘步向趙趙以獻歎

兮孰與脫羈而自如寧餐若木之華兮何復涉志於江  
魚排蒼梧為南巢兮掠崑崙為西戶朝矯翰於桑丘兮  
夕啄瑤英於玄圃俯瀛波之浩淼兮依鄧林而稅駕申  
志意而返素兮幸樊籠之永謝羣靈翼以為侶兮靳禍  
殆之靡及苟脫夫斯人之嫉妒兮又何悵乎遠集昔奮  
飛之無由兮敢逆望乎今路茲扶搖以天遊兮彼弋人  
之奚慕驥病棄而思秣兮雀傷丸而委沙匪仁人之提  
攜兮焉正命而流華亂曰將怡生為道真兮將渙忍以



求同將栖縻以求世兮將逍遙而御風彼至人之形休  
兮恒寂昧以為宗動不括曰至神兮靜而勝曰大通一  
趣向之乖刺兮倏悔吝其相蒙偕彼鷦之獲逝兮庶優  
哉以永終

感雙雁賦

有序

明石瑤

已未歲或餽予雙雁育於庭中問其從來曰弋人獲之  
也雖復窮蹙雅有高志蕭然獨立若賢士君子罹困侮  
遭播越而耿介絕俗固將終身也予既悲之而惜其未

能即去迺作感雙雁賦

何日月之徂邁兮草若木其易黃慨雙雁之翩翩兮去  
霜雪而南征彼弋人之慕之兮乘冥飛之未颺吾徒違  
其日遠兮中道失而悲鳴昔南發於衡湘兮北又逾乎  
瀚海既隨陽以定居兮又銜蘆以伺殆行有伍而進有  
律兮豈智周之不逮乃為罽羅之所收兮命或懸於菹  
醢噫嘻悲哉物莫不有時兮時不可再來一失其幾兮  
何人不哀方得意而遠適兮恒一舉而千里傳海上之

遺書兮歷鳥孫之故壘明妃去而張弦兮文姬歸而按  
拍感中夜之哀吟兮寫萬里之明月豈不居危而思安  
兮悲羽翮之既傷相眄顧於中庭兮獨徙倚而徬徨棲  
不於芟蒲兮失風雲以為翔忽流影之感予兮聲激烈  
而慘惶孤臣失志而惆恍兮貞女聞之而淚零維國遠  
而交疏兮苟衷誠其未明昔仲宣之去都兮踰荆江以  
淹滯陵失援而喪身兮亦胡為乎國士楷南冠之鍾儀  
兮繫越吟之莊舄相賢哲之不免兮固流離其焉悔吾

獨怪夫童子之無知兮恒蹴踏而呼之貿貿焉其欲來  
兮顧雞鳧而去之念天秩其能序兮內行純其有別富  
與貴其莫淫兮豈威武之可懾余獨好此高志兮薦芳  
泉而具粒相徜徉以容與兮知謝也之可食羌欲舉而  
低迴兮臨干磐而欲放羽被鍛而未齊兮愛莫能其助  
長鶴既鳴於九皋兮白鷗翩其遠歸有鸚鵡之能言兮  
亦振迅而西飛惟昔先王之觀化兮順物性而明人倫  
不使山者居澤兮不使水者居中原誠物情之各適兮

亦何必豢虎豹而羈麒麟古道遠而不可見兮吾與汝  
其焉往罹憂患之孔多兮世紛穢而鞅掌無忝爾所生  
兮吾苟得其養指歲晏以為期兮雖困鬱其奚喪亂曰  
吁嗟雁兮其德一兮其進有列不輕配兮是宜用之為  
儀大夫執兮雖則困窮心如結兮彼人而禽胡可說兮

錦雞賦

明 李日華

何珍羽之絢煜負冠距而文章既雲杼之妙組亦雪屋  
之奇翔載離邃谷來薦華堂擷珠穗以晨粒戛玉柯而

春鵬匪家禽之果厭伊靈產之特異縉采閒心瓌姿遠  
意時鳴時止恥詆宋公之談不矜不伐默消紀生之氣  
爾其修尾縷金豐臆吐綬苔印眠趺花藏轉脰俛玉案  
而窺縹囊信藻林之清侑

鷄雀賦有序

明  
謝肇淛

余自吳興徙治博州暇中讀子建鷄雀賦悲其意而戲  
效之博州治鄆鄆故子建采邑云

翩翩黃雀來自海南文采未備翬翅翬跳擲蓬艾飲

啄不貪卒與鷄遇便欲相甘雀言雀微毛稀骨小竊命  
大造暫寄林沼陋體腥臊不堪一飽君如見搏徒污牙  
爪鷄得雀言昂頭瞪視何物麼臍直不解事度江無食  
困頓幾死蛇鼠藏蟄思齧乾肺爾當吾前寧復舍爾雀  
得鷄言憂愁局蹐自恨卑微不生六翮仰天呼羣毛如  
蝟磔君無取我恐防綴弋鷄得雀言意殊不移距如倒  
戟背如交鉞而不服死焉用言為矯首喚鵲助吾取之  
雀得鷄言大啼恐怖時無鳳皇誰堪告訴不見玄豹南

山隱霧入林不深自遭殘蠹鷄乃擘翅紛拏決鬪雀急  
自投毛鍛肉皺大喚不止聲若嬰幼行人聞之莫不往  
救鷄乃高飛雀亦東徙梁父之陽漳河之涘構葦卑棲  
呼妻喚子幸逃膏俎苟活忍恥痛念驚魂前哭後笑羣  
鳥聞之皆來相弔皇天降鑒日月迴照自今以往勿復  
遇鷄

條鷹賦

明 田藝衡

若夫散質瑤星緇形綵架斂羽翼而多傷望雲霄而長



謝惟神俊之英禽奚飲啄於人下方其鍾山乍出火德  
初飈既學習於朱夏復祭鳥於金方眸電掣而睥睨翅  
風勁而翱翔喙如屈鐵爪似鈎鉉截鳶鷲於層漢攫狐  
兔於崇岡毛血灑而矯恣飛走震而潛藏豈燕雀之能  
伍又何有於鸛鷀及其誤入虞羅重膺鞬索勵此悲鳴  
戢茲猛翮辭鷀鶚於青雲狎鸚鵡於繡閣弔孤影而自  
憐束雄心而誰惜嘶朗月於清秋盼白日於碧落平楚  
斷思叢林絕跡逝隼牽魂啼鵲奪魄怨鷗蹲於寒繩恥

猿立於虛格雖依人而鶴馴時懷侶而雀躍至如爰命  
司寇頌爽鳩之名惟師尚父著鷹揚之聲搏鵬聞賞於  
楚澤逐獸著美於廣成使韓盧而却步豈齊鵠之敢爭  
縱斯伏役羈則徒生媿肌豐而神損空晝調而夜擘徒  
娛細玩孰察深情郊原遠別絲柱久縈若能解條而振  
羽當齊鴻鵠於雲程

忠鳥賦

有序

元楊維禎

錯號智囊而不能保其軀何也錯之智豈不知口語多

怨耶錯患諸侯王強大不可制即賈誼之憂於帝者故  
請削地以尊天子安宗廟所謂萬世利也是也七國反  
以誅錯為名帝又信讒於袁盎故錯斬東市世不悲其  
智而哀其忠良史如太史公猶以變古亂常取亡其軀  
病錯也烏乎錯志不白矣故予為錯賦忠烏烏名鬼雀  
以其鳴告凶咎也異乎飛駁之烏專媚人以喜兆而矯  
人於覆亡者予以錯比烏而盎為駁耳其辭曰

瞻高堂之巍巍兮官執法之大夫柏蒼蒼其正色兮惟

烏烏乎是居嗟爾烏乎孰辨雌與雄豈直反哺兮亦曰  
告凶哺名爾孝兮凶稱是忠胡主人之弗答兮昧休咎  
之明徵反傷以作忠兮嫉忠以為病彎射日之勁弓兮  
殫吾靈曰鬼烏杜忠告之利喙來搖尾乎畢逋豈不知  
口語之招尤兮寧弋死而不悔也抑哺母以將雛兮寧  
鬼烏之鬼餒也彼飛駁之附人兮異吾性之峭貞紛屬  
耳其楂楂兮不啻朝陽之鳳鳴烏既忠斃兮駁亦以佞  
屠嗟烈士之殉忠兮固異乎怵迫之小夫

後相思鳥賦

有序

明葉憲祖

鳥名相思以其從一而必歸也兒子華滋試之果然已  
並縱之遂飄然長逝矣余聞之更快沈日倪吏部愆忠  
入賦中作後賦

澤雉畜乎樊中訖未神王矧茲情種曷勝推喪去復回  
兮亦既勞止居者望兮亦既號止捨彼寥廓來就羈囚  
覩茲微鳥恩誼何稠是非忍人胡寧汝留維我小子類  
有心者挾彼樊籠並為縱舍縱囚若唐宗之庭開網若

商王之野任所如於廣莫之鄉恣和鳴於叢薄之下悲  
哉人生既嶮以巖每當盛年寡合多離閨人凝愁乎關  
塞征夫絕念乎庾廖覓徐郎之照兮入侯門而忸怩裁  
蘇氏之錦兮悵遠道之逶迤歷間關而偶遇蓋不可乎  
庶幾此千古之長恨鍾情者攬筆而歔歔孰與斯鳥之  
得所接翼而聯飛余不得重招斯鳥而告之將介鳩氏  
以致詞爾其就閒而避患審處而察機偕爾族類娛爾  
唱隨無復為人所得而徒寄爾之相思哉

百雀賦

明程涓

感瑤光之篤散降崑崙之崇丘集堂宇之寧止適藩籬  
之隱幽擢翩翩之素質鼓翼翼之殊尤奮緇黃之翅勁  
挺參差之尾修至夫三五聯翻百十成群俯啄黃壤仰  
棲茂林翔則依風止則連雲雖薄肌而淺色雅非戩而  
占芬作鳳凰之儔匹曾鶯燕之紛紜審錫爵之為祥習  
銜環之令聞及至朱明竣令東南長風六月一息鯢化  
無窮大火西景商飈彌空宅身逝者胥蛤以終何變幻

之無極信條支之號隆習西羌之侈獻標大家之文雄  
爾乃功滿凌煙壤翦林桐大夫滋掖列侯就封受上寵  
於邯鄲登三事於弘農加子墨為客卿主圖書奎壁之  
東

翰音賦

明舒芬

一雛之微仁體以歲一卵之尸地濁天清維若雞者積  
陽所營古亦有言火德之精匪神變化如龍之靈匪兆  
文明如鳳之禎爰備五德亶拔衆生凡物以色名也雞



則歲蕤禪禪黝皇犂驛龐乎匪若鴉之烏鷺之白鵠之  
青翡翠之翠可以一色而名凡物累於形也雞則羽以種  
異趾以增歲宵乎無若龜之毛兔之角蛇之足蟹之腸  
而不可以累乎其形凡物多為風氣之所櫻也雞則小  
健大鷄雌伏雄鳴究於鬼方等於帝京裕乎匪若雁之  
南燕之北鵠鵠之濟杜鵑之洛非其地之風氣而不敢  
櫻凡物多惟天時之迎也雞則晨焉斯職而不知風雨  
之晦冥踈焉自食而不知霜雪之嚴凝順乎匪若鶯之

於春蟬之於秋反舌之於夏鵙鵙之於冬固惟天時之  
是迎斯義文列之於象卦而甘石著之於星經若夫列  
職禮官呼旦釐成清韻遠響咸叶韶齔穿揚乎闕陞飛  
越乎宮屏警吾君之安寢勞同夜之忡怔抑蒼蠅之營  
營豈飛蟲之薨薨載聽三號漏盡鐘鳴盼庭燎之有光  
聞驚和之鏗鉤肆九重之洞開顧百工之既盈端冕旒  
以肅視垂黻纁以統絃於咨臺諫允俞公卿別忠邪治  
農兵修洪範典家刑去澆偽敦太平茲豈賢妃之所能

警戒實由一邪旦氣之虛明則難之功於是可銘也若  
夫士人君子牖瓮樞繩窮年卒歲敝榻孤檠氣少帥而  
鬱紆思有時而懵騰曲肱假寐警枕無能一有聞於咿  
喔乃束衣而載興孳孳一念惟善是誠於是室情竇啓  
靈扃性以定慮以澄私邪滌萬理瑩道心著天真呈無  
數以保戰戰兢兢牛羊不至於枯亡鴻鵠絕意於繳繒  
茲夜氣之無疵類聖教之可升駸駸乎大舜之徒慥慥  
乎軻書示之法程則難之功於是為可稱也厥若野曠

荒悲旅次寂寞敗壁頽垣霜垂露零遠人昧乎夜奔孤  
客怯乎宵征更籌長短而難定世路險阻而難行擘袂  
徬徨于暉昉忽喑喑之有聞定搖搖之心旌束裝并  
炊覓儔拉朋星披林麓霧冒郊垌說岐路之東西計功  
日之甲庚憐悠悠而弗懼犬狺狺而弗驚既舉足而十  
里於大明之方昇顧後則苦於追逐爭先則畏乎伶仃  
則難之功於是為可稱又或仁人孝子眷眷親庭上莞  
下簟恃怙已寧念白髮之種種猶風焰之殘燈知來日

之幾何敢頃刻之忘情中夜無寐目眷心怍審安節於  
內豎語喁喁而豐諄欣勦斲而若甜乃側身而屏營俄  
膠膠而到耳覺老夢之初醒於是盥漱櫛縱端鞞冠纓  
左右佩用容臭心并擬適所而褰帷習下氣而怡聲問  
衾衾之煥寒恐忘意之罔承或疾痛之與痒疴敬搔抑  
而得重輕苟父母乎未順若負罪而愴怛茲晨省之常  
禮雖古今之相仍獨文王乎能舉疑衆人之庸亦有未  
曾則雞之功於是為可徵嗚呼繫一物之眇眇幹人心

之惺惺固匪與乎提撕巧有類乎弼丞宜知己者寘之於圖畫人固不得祇以充庖之一牲

逐雞賦

有序

明 陳一麟

壬辰孟冬良月既晦余時托跡東皋濫人西席庭多牧雞沓擾咿嚙客笑謂余曰是區區者呼之則來拂而弗去盡淪而烹之將不可勝誅宜加竄逐薄罰以懲可乎且古有賦蒼蠅賦螢火微物以足見志君其因物而賦焉余方情慘況寂乃和墨抒繭聊寫我懷語不成聲敢

云擲地蕪而可哂當使覆瓿漫搦管而抽之詞曰

粵有地居平疇依阜為宅可鑿可耕為太平之樂國以  
邀以遊類幽人之泉石林間叢際牧繁畜益粒米滯遺  
搏啄狼籍維厥羣雞有如食客吾嗟爾雞其生甚微於  
埒於桀惟人是依而穀而殛將誰與歸毛羽雖豐滿而  
高不可飛文章雖成色而儀不足威然而精分日昴靈  
司晨明應異風而合節感兌陽而有形鏤金銜赦山玉  
唱聲冠文距武敢鬪敵而勇生食仁守信德咸備乎佳

名爾乃王孫公子踴躍博六則鬪之以誇里俗亦有卿  
士大夫金距介躅則角之而名譽毒更有英才博士華  
文杼穀則櫟之而祇取謫辱復有賈家小兒繡襦供牧  
顧盼指揮其若神君王喜之而寵渥又有紀渚一翁視  
候養育虛憍盛氣之潛消三年視之而若木若乃萬戶  
千門絳幘籌送閭闔齊開醒古今之醉夢村店茅簷夜  
月嘹空四境相聞詡霸國之聚衆是以棲樹五百祝名  
皆應仙公樂此而不欲上昇閒窗一席玄談殊勝書生



資彼而獲為論磨舌含香遠碑勒文弘至於詩歌盈朝  
之警易戒翰音之登禮重郊禘之彝書嚴牝索之憎漢  
武碧雞之祀秦穆寶雞之興魯雄斷尾越昂伏精玉質  
石藏鳴徹五更昭諫題句破壁雙翅非僅學乎王政奚  
遍麗其洪稱矧值國事之多故當起舞於中夜之間聲  
誰堪丈夫之髀骭遂戢翼而雲霄之弗凌悲哉雞今晚  
汝可憐既勿鴻之冥冥又匪鳳之翾翾使野鶴而立其  
羣爾骨無其昂昂俾鵠雉而同若飛爾羽無其泄泄徒

與鷺而爭食未若鳬之汎滴奈何呼則味味音則喔喔  
顧母哺雛招朋引族隨碩鼠之食苗效黃鳥之啄粟或  
乘彼塋垣或升茲矮屋或污我庭階或相我萋藪或越  
俎而盜庖或循屨而繞蹈見此羣羣增吾顚顚吾甫歎  
楊子寂寥之居詠蘇氏搖落之曲爾唧唧吾前嚶嚶為  
愴不能破吾涕而為笑反若益吾嗔而取譖喟世變而  
風頽雖日為善其不福曩貪夫與僉人即肆惱淫而適  
祿興汝物之罔比等無道而亦穀吾欲丈人以殺之案

共磔鼠之獄今暫追莊叟之烹焉謹倒奸邪之逐

鵙鳥賦

有序

明周用

癸亥之春假館於城隍齋宮有鵙入於公館之屋梁予有感茅鵙兩足狐之文遂為之賦

天地清寧兮陽舒陰肅物類化成兮晝動夜伏感鵙鳥之何為乃肖形於羽族太陽舒赫兮乃瞑朦其睢眸太陰收斂兮乃恣餐其口腹丘山之不知兮尚何責其識人蚩蚩之為珍兮尚何責其攫肉人既不識兮又何怪

其赫鷄雛肉既嘗攫兮又何怪其竊梁穀何不遠友兮  
山之魅魍乃兀處兮人之臺屋何不自處兮林之訓狐  
乃徑當兮人之蹊陸形側側而睢盱翼躑躑而翻覆目  
渺渺而邈邈足孑孑而跼縮聲咿呢而哀嘶氣默默而  
戚促心隱隱而貪婪貌瞿瞿而怵惡爭朽鼠而飽甘得  
溷蛆而詡畜燕雀兮為之紛紜烏鳶兮為之馳逐召梁  
鵲而告之兮則言不足辱網羅召甘蠅而告之兮則言  
不足污鎬鏃公輸觀兮無庸羽儀易牙胥兮無取溪谷

適從何來據於此宿叩黔雷之化機兮何必如此化生  
惟碧族之興司兮何不令其胎殯胡為乎產此羽毛胡  
為乎出此面目苟斯物之不除豈善類之能畜請詞兮  
鞠彼鴟願臆對兮如子服二儀運貞萬物蒙福形自形  
兮色自色生自生兮育自育正自正兮邪自邪惡自惡  
兮淑自淑毛有麟兮又有虎狼鱗有龍兮又有蛇虺芝  
蘭秀兮鈎吻成陰桂梓郁兮檣櫟連屬龜歷千歲兮龜  
鼈或生鳳翔千仞兮鸛鵲起搖驗萬物之皆然何一鵠

之責督雖不能去此心之貪亦不至如鴆毒苟我鴟之  
見誅宜族類之皆剝請體兩儀以立心收羣生於一掬  
乃收詞而謝子鴟吾於爾今有何不足苟萬物今各得  
其宜吾之心今亦有何獨

百獅賦

明  
劉珥

繫大造之無私兮普生成於動植惟皇仁之遐播兮運  
一視於萬國國際金天名稱西域窮荒汗漫岩谷深密  
四無人烟杳絕禽跡羌神獸之育乎其間挺然為毛羣

之特麟翼其姿虎背其質鉤爪鉅牙銅顱鐵額柔毳茸  
如勁毫錐立感頤今方頤修尾今闊臆發聲今雷振瞋  
目兮電赫登萬仞兮坦途越千里兮咫尺猛氣揚兮層  
漢失其高雄心騁兮九牛失其力方其朝出哺也搏獠  
獠以橫殮及其夕歸寐也藉林麓以為席古有取其筋  
以為絃兮鼓之則衆絃絕得其尾以為塵兮揮之則蚊  
蠛息名將假其容以制敵高士貌其像以奠宅譁人請  
其性以達物情伶官制其樂以諧金石顧尋常隻影之

難尋今乃覩成數之滿百或偃仰於長松之陰或容與  
於平沙之磧或蹲或眠或奔或食或後而騰或前而抑  
或捲舌以奮髯或俯耳以屏息或口口之相銜或隊隊  
之相襲隆隆其形蒼蒼其色各生其生各適其適偉哉  
獅之為獸蓋金精降靈非有他物之所能匹昔黃帝得  
於南海漢順時貢自疎勒唐貞觀間來於康居宋宗慤  
克夫林邑皆歷代之所珍而於我朝永樂宣德中屢同  
方物以充庭實休風布於九垓神威震乎蠻貊匪來一



國之梯航實聚萬方之玉帛四時調千祥集五穀登蒸  
民粒文德修干戈戢人無遠而弗歸物無猛而弗格爰  
茲西方難制之獸首馴階墀而匍匐重瞳載瞻百辟忻  
懌賜豢上苑暴心從革旅四靈以為朋任百獸之辟易  
乃聖世之奇觀今孰謂一時之幸獲肆圖畫其傑異兮  
恐其久而真失麟有詠兮同傳藝有訓兮是式豈徒資  
以展玩兮固將以昭我祖宗懷遠服強之盛德

御定歷代賦彙補遺卷十六

御定歷代賦彙補遺卷十七

鳥獸

天馬賦

有序

宋  
米芾

高君素收唐畫御馬翹舉雄傑感今無此馬故賦

方唐牧之至盛有天骨之超俊勒四十萬之數而隨方  
以分色焉此馬居其中以為鎮目星角以電發蹄踔踔  
以風迅鬚龍顙而孤起耳鳳聳以雙峻翠華建而出步

閭闔下而輕噴低駑羣而不嘶橫秋風以獨韻若夫躍  
溪舒急冒絮征叛直突而建德項繫橫馳而世充領斷  
咸絕材以比德敢伺蹶以致吝豈肯浪逐金粟之堆故  
當下視八坊之駿高標雄跨而獅子攘獐逸氣下裛而  
照夜矜穩於是風靡格頽色妙才駘入仗不動終日如  
坏乃得玉為銜飾繡作鞍隲棗秣粟豢肉脹筋埋蓋不  
如偷盧噬盜策蹇勝柴鑄黃堦而吐水畫白澤而除災  
但覺駝垂蹴節鼠伏防猜妒心雖厲馴號期諧誓俛首

以畢世末伏櫪以興懷所謂英風頓盡冗長常排嗟乎  
若不市駿骨致龍媒如此馬者一旦天子巡朔方升喬  
岳掃四夷之塵較岐陽之獵則飛黃騷裊躡雲追電何  
所從而遽來何所從而遽來

斄牛賦

宋  
孔寧子

惟茲獸之攸生亦棲遐而憑阻遁縣野於岷隅挹清源  
於庸渚奔逸躅而倫珍載墳首而乳荇茸長斄之髯鬣  
戾狼情而首鼠邁羔羊之如膏伴蜉蝣之楚楚既作表

於禮樂又為容於軍旅奉藩岳之休明被戎荒而既序  
班賂賂而來庭超邛蒟乎其所以

園陵犬賦

宋

王禹偁

嘉彼御犬既良且馴蒙先朝之乃眷向皇宮而託身有  
警蹕以皆從無起居而不親繡紵飾以煒煒金鈴奮而  
振振飼以公庖彭澤之魚兮曾何足道畜之土性西旅  
之獒兮詎得同倫健遂天步慵眠地茵效珍比夫異獸  
供命等乎通臣若乃風暖掖庭花繁禁禦扇似錦翼之

雉籠近雪衣之女入赭袍兮曳尾聞霓裳兮率舞循遶  
乎金塘徘徊乎瑤圃睥睨爐烟追隨蠟炬見觀書於乙  
夜聽求衣於未曙既無吠乎投籤每夙興於曉鼓莫不  
默識聖心潛知天語備指顧以弗迷奉周旋而見撫第  
晨遊而夕嬉又安在乎逐麋而捕鼠彼宋促之與韓獪  
又安得同羣而接武者哉嗟乎事變人天時移今古秦  
皇采藥島中之士未迴軒后煉丹湖上之龍已去欠詆  
鼎以登仙對遺弓而戀主卧錦鶻兮罔安啗鮮食兮彌

苦豐顱載減負重鉞而不勝病骨其羸求敝蓋於何所  
赫赫顧命明明嗣皇念犬馬之微誠義存始卒徵父母  
之所愛深增盡傷俾守園陵之地且殊槩紉之鄉縻索  
緇以璀璨琢籠檻而熒煌伏陪國薄車逐輻涼鏤幽宮  
兮黯黯號白日兮茫茫松阡夜月柏城曉霜依六尺之  
輿已成疇昔盜一坏之土亦足隄防表終天之巨痛甘  
朽骨於龍岡狡兔盡而見烹理殊矣漢駿馬死而陪葬  
事類皇唐



悼物賦有序

明  
王穉登

余家守犬畜八載矣旦自外來一鳴而斃僕夫何知惜  
惜稱怪余曰否否是物之盡而返之期也家人惑之作  
賦示焉

感茲厖之狎穉被衆采之文章守衡門之坵垣杜暴客  
之彷徨乃有赭鬣燦金皓領積素豺聲奪雷貌髮戴霧  
蹈列缺之飛影躡駢弱之捷步若夫瞰雪悅性浮雲幻  
形帝媛作配天星紀名易奚取乎艮象風曷咏乎重令

畫虎胡為而反類兔死何事而當烹復有宋獵韓盧盤  
瓠旅葵修豪螯睫白望青曹長喙曰獫狁尾名獬虎賁  
何足猛青駸不能梟竊羸宮之狐白續馬廷之金貂至  
如秦君北園丞相東門魏食不檢齊境相聞女方嫁而  
被賣酒求沽而不前咸是類也而此復何稱焉伊憊眡  
其摧仆羌不測其何為哀拘攣以莫騁遽一蹶以逝而  
莫不錯噩惴惴唧嘈囁嚅憂孽畏咎滄滄泚泚臣獨慨  
生機之易盡兮嘆物命之無幾霜箨紛其夙隕兮風炬

奄而遽微舜華既夕姜兮蜉蝣又以宵斃蠢異族之蚩  
蚩兮同溘盡於黔黎彼蒼洵其降凶兮集余躬而無宥  
物何愆而嬰戾兮豈帝罰之濫授婉孌展其穉狂兮愴  
不怪其疾首哂僕夫之駘背兮亦莠言之自口悼物理  
之同盡兮省余膺而罔疚捐敝蓋之蒙茸匿骸骼之嶙  
峋擇樸櫟之叢林閔玄壤之幽陰去庖丁之斧斤就螻  
螻之侵尋庶完軀以終藏聊獨慰乎余心

逸句

附

懷鶚賦

唐 李德裕

修短有命行藏縱心未嘗張羅於叢薄射宿於川渚誠  
不忍於思矢惟載懷於好音

鱗蟲

盆池魚賦

有序

明 曹大章

支離子避世金馬之門越歷年載丙辰之歲適有采薪  
之疾棲於李君之廬廬之右有隙地一區偶因行樂輒  
一至焉中有埵就埵甃池方廣袤丈淵渟可鑑嘗有餽

君生魚者即不忍烹之置於其中朝晡二時飯已以其  
餘粒飼之拊其石則羣聚而浮於水若與人相狎者比  
以為常支離子曰爾何樂於是耶君曰子非子何以知  
子之樂也直以是魚之樂得其所爾奚其樂奚其樂子  
如有言僕願聞之子曰諾聊因伏枕應以斯文

天地好生萬物以成蠢爾庶類各肖厥形雖賦予之不  
齊均挺異而含靈覩鱗介之游泳觀羽翼之騫騰或潛  
伏於太陰或飛翥於高冥雖小大之分殊貴得性而忘

情若夫鳳翔千仞鵬搏九霄神龍巨鯢海運逍遙徙若  
移山噴如驚濤羗無心與物競胡異患之能撓相盆池  
之儵魚稟冲和之土德謝主人之侈惠藉餘波而假息  
方彼魚之在轍冀蹠浴之已足矧盈塹之渟潏乃優游  
而縱逸日相羊於其內行千里於咫尺雖蒙恩於曲全  
終眷戀於川澤於是支離子詢於浩然主人曰爾有樂  
於此者乎蒙竊惑焉敢問所安主人曰仁者不遺於一  
物矧茲含氣之類乎子獨弗見蟲能裹葉而却患蟻知

出垤以求生雁銜盧而避繳魚吐墨以遁形爰以矜其  
吮沫而就斃非掠美以市名乃命童子曰經曰營因四  
為池復甃之平引以滄浪餌以香杭或潛在藻或躍在  
萍胃以魯縞澆澍何驚予固樂夫魚之樂其樂於魚者  
邪子之謂矣無乃異乎支離子復趨進曰譬諸禽鹿頃  
而見獲非無嘉藁更饒美穀踈頸觸笄頓纓躑躅若赴  
蹈於湯火豈甘夫珍芻而玉食每紆思乎冥冥長寄心  
於逐逐嗟此微蟲分性固不同我視洋洋兮彼則顛顛

允矣仁人兮哀此厄窮放諸江海兮榮願斯終主人聞  
之始焉而顰卒焉以喜爰揭其裾載曳其履取以懷之  
遵江之涘乃為詩曰步江上之芳洲雲澹澹兮水悠悠  
渺一望兮千里惟白鷺兮沙鷗覽物性之容與兮孫何  
足以淹留舍旃舍旃兮任遐逝而遠遊爾乃揚髻奮鬣  
蜿蜒跌宕煙霧縱橫倏忽萬狀緊髻髻其若神排龜鼉  
而直上扣寶欽之砮碣踰陳辭而來貺曰恭承嘉惠兮  
渥且沛兮蚊蚋負山兮弗勝戴兮何以報之兮隋珠鄭



珮兮君子萬年兮而無艾兮言既則萬籟俱寂寥然天  
宇風恬浪平一無所覩日隱隱而銜山月朧朧而印浦  
擘駢策而旋歸永陶陶而樂胥

螽斯羽賦

明  
程大約

歲序迎秋萬彙迴薄覽華時育茂對榮落梁王遊於兔  
園觀螽斯之羽詵詵和集而欣有託於是敞初筵命廣  
樂進友生啗吟嘯鄒陽枚乘之屬袂聯而靡步却相如  
後至揖客若若王乃歌國風於周南紀春秋於魯繹授

簡於司馬大夫曰夫蟲之不經見者多矣而螽斯之羽  
卜詩興詠虹經特書故者以為蝗屬螟螣蝻賊食殆無  
餘何祥何異而宣聖為之標揭公宮為笑吟也奇僻子  
搜麗藻子攄肖形象德試為寡人賦而解諸相如於是  
獵纓而起逡巡徐徐曰夫寓形縣寓寄動黃壤有生皆  
適無微不彰彼螽斯之積羽羣毛介之蜚揚環動則叢  
出於大陸肖翹則表沴於恒陽峙角修股綠衣黃裳棲  
遲猷猷啞喋稻粱一生而九十九子百爾嘉祥此縈膠

木於南山采卷耳於周行周姬之誦文母頌聲迄今猶  
洋洋也若乃德施政平化行比屋厚澤豐仁鮮保榮獨  
蜚負而不灾覆濡而不穀供鳳皇以為餐化魚蝦而應  
祝何茅茨之能盡豈叔季之驅逐公宮之頌以和而不  
以乖春秋之事虞灾而不虞福合德取義謝訛去謬矢  
流徽於風雅亶標奇於簡牘肅行羽於天田願觀生於  
亭毒鄒陽聞之怡然思服有懷周雅敬揚清曲於是乃  
作而賦薨薨之歌歌曰何薨薨兮羣飛繁續紛兮於羣

蔽雲天兮拱日暉宜繩繩兮願不違又續而為揖揖之  
歌歌曰何揖揖兮斂羽迴縈積兮羣聚鳴長風兮吸寶  
雲宜蟄蟄兮麗不數歌竟王遽首肯乃顧枚叔起而為  
亂亂曰螽斯羽兮麟之趾美振振兮諸公子宜萬姓兮  
傳千禩綏福祿兮歌樂只王亟稱善乃屬侍人獻壽羞  
璧譜諸子墨復之無數

蜘蛛網雀賦

明 田藝衡

秋蟲惟中宅虛為宮秋蟲惟智網羅自莅秋蟲惟仁一

面以陳秋蟲惟義取物自至爰有黃雀上下樊籬其形  
甚細而飛則卑竊我稻梁何裨於時鷹隼不擊矰弋莫  
施蛛網之設雀則離之剝其毛羽啗其膏脂民食之害  
爾其翦夷除一警百亦快我私嗟今之世法網甚滋文  
理密察秋毫繭絲獮者巧避彊者橫披雖投其羅而勢  
不支凡今之人經綸者誰繩其紀網以維所司人不如  
蟲吾為爾悲天網恢恢疎而不遺

告蛇賦

明  
王穉登

噫嗟二儀何仁川容海涵魑魅匹生於騶虞鵠鷗齊孳  
於鳳鸞雖並育而不害亦竟惡其民殘蠢異族之無知  
諒欲化而非難故韓公屈而鱣去宋君來而虎遷伊斯  
蛇之為類豈獨恃乎冥頑苟爾衆之不迷夫盍聽於斯  
言余之困窮有是敝廬左帶粉堞右臨清渠罕崇丘之  
崔巍鮮茂草之陸離迺挾儔而援類穴垣墉而居之爰  
若青螭赤蚪金蟒墨蝮巴能噬象蚺乃食鹿雖巨細之  
懸殊固同妖而並毒爾其白日楣緣玄宵棟伏黃口震

驚家人恐悚既怒颺之飛騰又朱鱗且星目彼生之者  
既云獲珠而此殺之者復奚為而致福余欲與爾從事  
於白刃兮即不忍其骸鯁羌何心以徼惠兮亦寧為隋  
侯而不為孫叔也居城市之喧卑兮又誰與夫川谷也  
冀靡恤於一遷兮遠危機之倚伏也即不為余之禍兮  
終豈不為爾之自淑也嗚呼幽壑逶迤陰崖鴻蒙蜿蜒  
屈盤惟汝之從後千百年為蛟為龍

鞠胤賦 有序

明  
劉綱

予少作鞫鼠賦而未叙其祇以因嘲何體物之與有茲  
檢篋得舊賦而叙之叙曰坤維之氣毓而為人多厚重  
直方之士重厚直方者投焉相彼鼠輩切齒殊深故三  
語諺云川惱鼠非獨川有之而惱鼠者歸之川能惡人  
哉綜厥所元非旦夕故嘗稽達川人之惱鼠者多矣大  
氏飲三川之水與上池同神奸物怪竊軀殼混影響者  
川之人盡能鑑之形骸之外豈惟惱之將必滅之滅之  
從惱生也川惱鼠者自姒氏以下可畧數焉蠢之有苗



誓師克之惱鼠也。獬豸孔熾，太原奏公惱鼠也。都亭埋  
輪豺狼，務去惱鼠也。會稽分符服賊，成謠惱鼠也。若乃  
仲通之斥國忠，太臨之過李定，范氏疏近，習而曰豈堪  
再壞惱鼠也。安民論章蔡之奸，華父指彌遠之失，集英  
置對而曰：以首竄為圓機，惱鼠也。引伸充類，不可殫指。  
茲其凡已。夫夏后西川首尹氏，文武為憲，廣陵曾子諸  
君並屬亞旅，不能除惱鼠，有以取之哉。抑生長於川  
風氣固拘焉。試觀鞠賦，情見乎辭。

嗟大塊間瑣然有物動定窺人謁來倏忽乘暗而趨初  
昕始伏鼠竇渠名諸醜備足檀輻公執而怪之尋鞠之  
曰種種毛族兼適陰陽獨有若輩消阻閉藏跂跂脈脈  
緣廩循倉投間抵隙咕囁相將農人胼胝畊風耨雨滿  
篝滿車穰穰盈止上輸公儲餘飽父子有力自食匪競  
於爾爾乃比類連羣總總搏搏睢睢喬喬不主常聲批  
糠鋪地放飯何悛若茲害稼方慝蝗螟又若約豐壙之  
閤閤葺夏屋之渠渠裳衣飽篋史籍盈筥聊供服玩各

足何私若復窟堅垣破華移竄古瓦躍新題筭無整籍  
篋數完衣恣情所欲利口交馳穴食盜人以自便居然  
滄滄而訛訛雜聞其聲莫悉所以今方得執諒復何辭  
鼠乃愕然震警頭搶地而訴曰公所督過備矣臣得數  
言而死不朽乎檀輻公曰姑言之曰萬物熙熙皆為利  
來臣可行輒行可止輒止當食輒食罔叩所主謹避於  
人曷敢相倚於星為虛於楚為齊山於雍州載厥尚書  
偶螢伺夜是為仙徒臣乃動臣脊脅而行任臣天機而

鳴相跡以尾相糾以聲而不為也不知也李廷尉吏上

蔡多臣所處常山王奉

原本缺  
十二字

嬰頭學臣竄漢孝廉郎

識臣獲絹百疋顧臣鼠也齒髮中亦有千萬臣而無數  
者矣饕餮曠貴魍魎備員日支中府月給禁錢不功而  
祿汰多而安與臣害稼同排門閹穿宮禁伏廊階通臺  
省誣上行私蹤跡莫訊盜叢神而忘反食牛角而已甚  
百孔千竇比周相隱託社為家薰灌交寤與臣壞垣屋  
同閃爍狡獪閹茸無俚黨結歡如背輒譏毀熏天銷骨

訟囂盈耳與臣有聲同紆青拖紫銀黃綰綬羅紈曳  
黼繡霧綺蒙汚芳華襲臭二月新絲萬家織手填此穴  
壑穿結誰訴與臣齧衣同穿鑿孔壁之文殘斷宗儒之  
旨藉以獻諛眊調不恥博昭名牟鉅利誦之成羞投之  
忌器與臣蠹籍同且孔贊臧紇之似章毒害實憲之腐首  
咎兩端之夫竊謂潢池之舞因斯以譚人面鼠心者比  
比冠裳中儻持法眼眊之直蹲身伺釁拖尾馱竄者兄  
弟耳臣且有皮彼應遄死若曹寧盡濡血三尺乎悲哉

釐牛若垂天之雲能為大矣而不能我執意造物者固不能缺一社君也而徼紂極我公之武震無乃頓而小乎檀輻公曰不然物有纖而足喜拙而見憐故龍門之蜂可釋景陽之螢可聯海濱之蛙可問江邊之蟻可全夫入淵者胤首不任狗而彼鵠所挾何足嚇鷓鴣盜肉煩張君之筆傷衣神許氏之符斯其細者也食場麥而罔勞禍盈於世蠹郊牛而改卜罪徹於天昔幽人熏之斬殄若類睢陽掘之不令生全且若恃技足斃象乎潛

入中傷其計詭隨恃猫眠長共乎欺飽乘勸終無生時  
恃大足嚙狸乎梁州一磔迄靡孑遺恃詐足自全乎覆  
地隣猫嘒嘒安咨恃匿孔旁多乎闔戶灌穴遁甲奚施  
五技窮汝不厭憎頻三歲貫汝弗省貫盈襲狗輒靡譏  
且頻呻遺矢穢蜜惡濟黃門逢人隣死闕里鳴琴咒不  
待岑厭不待髡此時司命實在狸徃尚安開汝喙哉於  
是所擁狸徃眈眈虎眈掉尾包然垂涎作聲之時久矣  
鞠辭既縱使殺之

螢賦

明錢微

既秋之望凝雲閔月涼飈不動炎氣轉烈海石子禱祝  
融之收威祈商祿之斂爍日納天暝振襟握髮緩步垂  
楊之隄徘徊空曠之宇但見暗中發熒熒之光四顧騰  
輝輝之楮忽聚而燄相叢或散而照餘野去來靡恒應  
接不暇如升鈞天之庭明星列宿點綴於寥廓如入百  
寶之臺隋珠夜光閃爍於峒堯如登文殊之室佛燈慧  
照燦爛於雲表怪哉斯何物耶胡為而來耶父老揖而



進曰此螢也非怪也時至而生莫測其情景天夜照町

疇宵行夏秋之交陽鬱陰萌大火西流溽暑猶蒸火行  
將禪金商來更土旺其中物幻而凝腐草與濕雨相軋  
蠹朽藉風化而形紛紛藉藉進退縱橫若有若無乍滅  
乍興蓋非蠅之穢其腹而聞腥營營亦非蟲之毒其吻  
而入夜茸茸乃造化之恒然為亭毒之均鍾海石子喟  
然而歎曰有是哉品彙紛變孰眇如螢宇宙鈞陶不遺  
么蟲飄光零亂在影騰衝潛而察之有會予哀夫太陽

當空斂光於虛善藏不炫非居謙乎暑運南旋胚胎始  
繁屑類以息非竢時乎內含其精外表其真在冥不晦  
非竭誠乎吾聞古人囊以繼照或以渡軍非致用乎問  
其含飮僅於清夜湛露是吸非抱潔乎蘊朗能照過草  
不焚非秉仁乎綴於珠簾翠幙之上爍雖微而景色因  
以倍增入於部屋重闔之內踪無定而虛白為之逾煥  
兒童自為擾攘兮雖撲之而不熄星河相為燦爛兮若  
相輝而聯奕即暑雨之時集兮霑濡濕而猶赫嗟乎睠

此錙銖之質亦效分寸之能實並育於大造在人世而  
無憎彼皎皎之偉夫兮稟正氣以毓靈或泯泯於斯世  
兮顧淪沒於幽冥況乘暗而生欺兮動止逾禁不能自  
照兮愧彼翺飛之凌騰亂曰晝夜兩曜兮為我無窮之  
照聖喆六籍兮為我無盡之聰倘矯翼而獨上兮可以  
負蒼冥而倒景即藏輝而匿影兮亦且同劍彩之埋豐  
一笑彼螢之熠燿兮曾不足彷彿含英咀華之靈瑩

蚊賦

明  
錢 薇

海石子鬱攸伏日之炎偃息秦溪之傍穉幼相娛解袂  
需涼聊適性於蓬茨就披拂於脩篁畫若羣蠅之營營  
萃而穿予之襟裳驅之不能坐待宵光暨夫羲和之馭  
西邁崦嵫蟾蜍之魄映於上方百慮退聽神遊混茫豈  
料醜類如彼黍民有翼而飛長喙而銚惟鷦母之毓孽  
聚羣黨而鏘鏘衆繁熾而莫數勢旋空而飄颻厥名曰  
蚊入夜披猖戶牖莫翳踰我垣牆翅過春冰之薄嘴同  
夏麥之芒往來中庭伺隙翕張伊嚶相逐漸及匡牀巧

肆彼之毒螫難脫我之搶攘餐肉血以療饑乘昏寐而  
莫當針鋒所加霍若荆卿之匕烏叱所翕詎止淮淝之  
鎗嗟乎天地生物兮惟人最靈百物聽命兮莫之敢櫻  
悍如虎豹兮狎之而馴變如蛟龍兮養之於庭孰是磨  
牙致毒兮敢恣肆而縱橫怪茲小蠹兮乃纖其喙勢不  
如蜂之捷兮尾不如蠆之螫智不如蜘蛛之巧兮巨不  
如九牛之搏徒抱不仁之姿潛張暗中之虐予方襲夜  
氣之爽少解旭日之酷爰脫絺絺暫迎涼颼集朋儔而

談笑或觥籌之互飛啟北扉而倚脩竹淪甌茗而鬯幽  
期吟哦不足漫爾支頤乃引其儕遽爾猖披投間捷於  
倏忽隱刺工於斯須羣圍簇以成市或散漫而雲敷我  
何暇於為防彼若脫而逝斯一或轉而他顧已巧肆於  
鎗錐既昏暗而難睹更微茫之莫窺將蘇張之利口眩  
人以不測抑郭循之暗刃驟發於不疑雖有膚臂與捷  
力奚能防爾之忽微忿蝟毛之紛集奈通夕之腴肌惟  
饜足而不去乃一擊而無餘銳口方張夫叢戟織身應

手而為齏嗟乎吾惡汝之為殃又悲爾之見傷始知造物忌過取因悟利害其相將彼讒邪兮寧不鑑爾之胎禍恣殘酷兮乃或益甚其鴟張既鼓吻而接噬抑衝口而玄黃恣饕餮於一時昧遺患之莫殫得不足以償失宜先哲之所歎鑒比蠛蠓之攘攘兮何不顧害而忘貪願早慎其長喙兮詎令追悔之莫還安得訴彼蒼穹兮母為育此羣奸庶化工之生生兮盡仁厚而莫相戕

蚊賦

明  
黃省曾

蠟眇者蚊雜午受育專與溝塗滋滿鬱燠假太陽之末  
光乃施翼而化足本陰汙之穢肖故昏揚而晝伏徊徊  
恣恣千纒萬屬挾豺鼠之養情螫生民之血肉倏眴乎  
幃帳喧營乎屏燭從容玉堂彌擾金屋鼓類求聲上下  
反覆有間斯入逢肌則撲啗得意而因休吮長夜以飽  
欲使彼憂臣失寐思婦輾枕烟之不稀扇之不屏音若  
遠而巧叢手將掉而善警思寧夕而不能擬貨殖而胥  
等維皎日之在東潛鬼域之微影願涼霧以早驅置天



下於安寢

憎蚊賦

明 陳繼儒

山有靜者高卧匡床解衣褫帶一枕羲皇何物么麼號  
曰蚊蟲體肥而脆嘴銳而剛粗成羽翼別有肺腸居心  
不淨巧言如簧乍離乍合忽低忽昂無貴無賤時陰時  
陽競刀錐之纖悉藏牙爪於毫芒覲左右之狎昵恣膏  
血之噉嘗樂袒裼疾冠裳性縱橫身毀傷曷不蟻夢而  
王曷不蝶夢而莊曷不蜂釀衆香曷不螢投夜光曷不

當車拒輒賈勇螳螂曷不餐風吸露羽化蜩蟬爾中則  
熱爾德則涼閃倏似詐飄蕩似狂潛伏似怯煽動似強  
細同蠛蠓毒甚豺狼量負山之非任倚入幕為智囊逐  
臭既慚於清白刺譏又近於雌黃若夫幃帳稀疎簾櫳  
穴竇隱隱啾啾轟轟驟驟去若風飄來若雷吼明噪大  
廷暗欺屋漏恃謀夫之孔多喋邦家之利口苟有愛於  
髮膚遑恤變生於脈肘使人扼腕歎攢眉抖擻如因  
重圍之兵如失孤城之守壯士怒而裂眦美人怨而搔

首隱几失聲於子綦曲肱變色於魯叟驅之復來覺之  
善走柔若無骨不足以安尊拳實繁有徒恨不飽孤毒  
手於是正身危坐捍御惟謹略經揣摩忽為齏粉好聚  
亡身多欲殞命醢鷄大笑於鉶罍蟻蟲遠吊於項領偶  
脫蛾火之燈或逃蛛網之阱自謂遠舉而高飛實則行  
險以徼幸猶且廣播虛聲乘閒思逞掃蕩不能渙其羣  
吹噓不能變其性我惟束手而待望赤日之當空冷眼  
而觀付白帝之司令蚊乃善幻怙終不悛滃滃訛訛緝

緝翩翩號召羣小援借聖賢曰仰之彌高鑽之彌堅瞻  
之在前忽焉在後此天之未喪斯蚊也其然豈其然

夕蛾賦

明 郭造卿

余旅游於塞北投野寺而托宿謂暗室之偏隘乃露處  
而秉燭二三童子若駭若服時維仲夏百物煩生唯塊  
坳之潛動與圓集之賦形若絡緯之夜織若耀耀之宵  
征若蛙部之鼓吹若蚊陣之軍聲蜩竅初啟鶴棲復驚  
彼淒清而嘹唳皆助余之苦吟最爾飛蟲曷來繩繩短

喙燦粉巨翅搖金倏多倏少或夥或零有知無知有情  
無情豈暗投之勿白及覆照之未明爭借輝以叢集徑  
如燬而迴縈非上下之火鼠及往來之青蠅齟齬所燎  
兢兢而傾余將以為無幸少聞鼓翅而復升又以為集  
爍之不可當必遠向菌木而自藏尋復振羽何異探湯  
微者或一再而繚繞鉅者則旋轉而徬徨胥靡爛於鏖  
戰不知曾為燎之所戕盡爾族黨至已斯亡俄頃瞬息  
折墜無光浮盆盂為鼎鑊沈膏脂於豆觴寧趨熱而速

斃不就涼而延長豈薰之有馥而煨之為芳甘蹈火而  
俱焚以篝燈為崑岡嗟物之外蔽故昧死以趨炎乃人  
之內熱不知彼之燂燂嗜義易厭嗜利彌堅或因難而  
止或中道而遷奉首幸免蔑理苟全方寸之慾勝則七  
尺其何慳旦夕之謀遂則百歲其可捐貿貿汨汨蟲何  
辨焉故有感於物物用告乎元元惟隨日月之照臨而  
保天年於自然

蟲賦 有序

明  
時季照

天下之物有大者矣昔人嘗賦蒼蠅蝸牛或者陋之予以詩之三百多鳥獸草木蟲魚之細夫子固取焉言之契道何間於大小是則蒼蠅蝸牛之作蓋有以也雖然其小於蒼蠅蝸牛者有蟲焉予忘其鄙陋而賦之俟我同志庶幾取斯

肇鴻濛之既判羗品彙之紛如迺各正乎性命匪巨細之有殊奚爾物之含質獨貽患而切膚曾不能以自養托口腹於人軀爾其為狀也或白或黑至微至眇不甲

不翼匪牙匪爪利嘴瞋腹傳蜚侶蚤蠃蟲三百有六十  
罔克方其小迺間生於介冑而常處於衣禪曰蟣是卵  
熾厥子孫屈朱明而少伏暨玄英則衆屯當其出乎深  
縫離乎敗絮泊腰領以逶旋齧膏血而吮茹蠹蠹繹騷  
恣其飫飽如砭如針朝啐暮咬非告子孰能不動其心  
非北宮黝又焉得不為之膚撓也若夫通侯顯相貴嬪  
寵嬙羔裘豹袪錦衣繡裳焙以雙鳳之炭薰以瑞麟之  
香顧容身之無隙乃滅跡而遁藏視介甫之緣鬚龍顏



是哂而紀昌之習射烏喙斯張至於酸儒寒士窮夫嫠婦鶉衣穿結犢禪繼縷帶浹辰而不解身捐瘠而穴處故相率而攻刺俾瑟縮而偃僂嗟嵇康之不堪手固息於爬搔而士蔚之多病日不替於采取迨其蕃衍盈縷繽紛如粟提衣一振舉手可掬復有同種異類依竹附石披霜露以繁育入磽确而噬啞枝葉為之萎落砌礎為之圯缺若斯也戕於物之無知有是哉迫於人而為孽奈何咸邁其悔莫禦其毒亦既憾於眉頰安得具夫

湯沐令徬徨而相弔殲醜類於信宿庶查道之衲衣可  
浼可濯而王猛之豪談無拘無束俾衆體之安適儼容  
止之雍肅嗚呼噫嘻青蠅營營所希餘腥特因刺於讒  
夫迺見著於詩經毆陽撰賦是嫉是憎矧爾物之最爾  
而罪浮於青蠅者乎

蛆賦

宋  
薛士隆

有腴而腴有滑其軀不翅而飛不足而趨甘帶而安於  
汙穢肉食兮肥螻膚客為余言是曰螂蛆螂蛆之形蠢

蠢冥冥無鼻之馨無目之明孰沸於湯孰爛為羹繫庖  
厨之靡清斯微物之化生或以為醯醢而聚蚋食露之  
來蠅也是故蛆之所萃為修為膾炙湑之味八珍之類  
食經之貴皆夫人之嗜也設有主賓或食饌而變色牲  
殺備薦酒行拜百有蛆蠕而見焉則中筵之上未有不  
汙茵而噉席者矣若夫溷坑圉廬青蠅每集飮餐而蛭  
蛭生下濕彼為何來之扇者是亦見聞之氣習也食器  
而生嘻其何甚蛆聞而躍託言於噤請以事陳世蓋有

矢嘗而疽飲者曾何加於我哉不招乃來斯須已孽事  
有急難無施於事甘蟲孰生嬰童小子蠹心罔覺或濱  
於死我形我蛻蠹之爾耳一杯之水則彼垂亡而倏起  
矣天胡不仁生此微麼論功於我猶不我可彼屍然八  
尺之堂堂方卿蛆而為瑣也食食之餘君子疾夫君庖  
已蠲蛆焉所居乃藜園蓬室之士猶粗飯之不飽蛆安  
得而食諸惟君子儒求諸鄙夫蛆言感子余是以書

逸句

附

蜘蛛賦

宋張耒

魚棲假淵鳥棲求木而我所宅獨取諸腹巢於牆屋人  
不予取朝蠅暮蚊食人所惡彼殘物所養而無益於世  
雖名人兮斯蟲是愧

蟹賦

宋高似孫

霜露重降日月其徂萬螯生涼含黃腴膚其武郭索其  
皆睢盱其心易躁其腸實枯勇鼓而喧集齊奔而並驅  
執一穗以朝魁目洪溟兮爭趨工緯蕭兮承流截臆沸

今防通

蟹賦

南唐

江文蔚

外似多足中無寸腸口裏雌黃每失塗而相煦胃中干  
戈常聚衆以橫行

蟬蛻賦

唐

左 牢

乍舉輕躬初留具體薄翼而朝陽始照黝綫而宿露新  
洗纔發響於林下已傳聲於澗底驗形有二責實無雙  
啾啾而送恨蓬戶嚶嚶而添愁瑣窻吟遠樹於荒郊思

盈秋野噪寒花於別浦韻遶晴江

蟬蛻賦

唐李遠

據險形柔拏空股戰方疑乎蠖屈終類於龍變洞曾達  
腋玲瓏而素甲皆虛潔已全身輝赫而黜光已遍俄分  
曙色似遇良時便有凌空之意還生去故之悲嗚嗚而  
頻遷碧樹淒淒而若紡寒絲響遶晴雲傳楚岸之風遠  
聲催晚景怨陶家之柳衰

御定歷代賦彙補遺卷十七



謹案卷十六第十七頁前三行春而祁寒候弗時  
今刊本祁訛祈今改

第十八頁後五行托陽山之峻址刊本址訛趾今  
改


第二十六頁後五行北又逾乎瀚海刊本瀚訛翰  
今改

卷十七第十一頁前五行遠危機之倚伏也刊本  
機訛饑今改

第十三頁後四行饕餮曠貴刊本饕訛饕據左傳

改





總校官庶吉士臣張能照

校對官庶吉士臣章宗瀛

膳錄監生臣王淦

膳錄監生臣沈璫